



# INUIT ATAQATIGIIT INATSISARTUNI

---

15. januar 2007

Inatsisartut Suleriaasianni § 36, imm. 2 naapertorlugu Naalackersuisunut apeqquq imaattoq matumuuna saqqummiuppara:

**Naalackersuisunut apeqquq: Nunatsinni politiit suliaminnut atatillugu, inuttut sakkortuunik aammalu tarnikkikkut nanertuutaalersartut eqqarsaatigalugit, taakkualu qaangiiviginiarneqarnissaat siunertaralugu, Naalackersuisut sunik suliniuteqarnissanimmik pilersaaruteqarpat?**

(Inatsisartuni ilaasortaq: Olga P. Berthelsen, Inuit Ataqatigiit)

## **Tungavilersuut:**

Ukiut kingulliit ingerlaneranni nunatsinni pinerluuteqartarnerit annertusiartuinnavipput. Pinerluuteqartarnerit annertusiartuinnaangillat, aammali pinerloriaaseq sakkortusigaluttuinnarpoq. Taassumap saniatigut nunatsinni imminortarnerit amerligaluttuinnartut, politiit suliaasaannut ilaalluinnarput.

Suliat taamak sakkortusinnaatigisut, inuup kialluunniit kisimiilluni imaluunniit suleqatigiit ikittunnguullutik piginnartuarlugit inuusinnaangillat. Politiit ataasiakkaat aammalumi suleqatigiiat amerlasuutigut pisariaqartippaat, suliaminnut tunngatillugu tarnikkut ikiorserneqartarnissaq. Taamatut ikiorserneqartannginnerup kingunerisarpaa, sulisut pikkorissut nunatsinnilu annertuumik atorfissaqartitaasut suliffimminniit qimagutiinnartarnerat. Politiit ilinniarfiat nuatsinnut nuutsinneqarmat, nunatsinniit politiit ilinniarsimasut tanngassimaarutigalugit pigilersimavagut. Ajoraluartumilli ukiuni kingullerni tusarsaagaluttuinnarpoq, politiit suliatik sakkortuvallaalersut qimattariaqalersaraat. Tamatumunnga pissutaasunut ilaalluinnarpoq, inuttut nappataminnik artorsaraluttuinnarneq.

Tamanna qanoq iliuuseqarnikkut pitsanngorsaavigineqartariaqarpoq, taamaasilluta nunatsinni nammineerluta politeeqarnerup tigunissaanut pitsaasumik piareersimasinnaaniassagatta. Nunatsinni politiit ilinniarsimasut, nunatsinnullu pissutinut ilisimaarinnittut siunissami atorfissaqartittuassavagut, taamaattumillu pingaaruteqarluinnarpoq sulinerminnut atatillugu, pitsaanerpaamik sullissisinnaassagunik aamma tarnikkut nukittuujustariaqarnerat.

Isumaqarpunga nunatsinni politiit tarnikkut oqilisaavigineqartarnissaat sulissutigineqartariaqartoq, aammalu paasinarneqartariaqartoq, politiit suliffimminnit qimaguttarnerat sorpiarnik tunngaveqarnerasoq. Taamaasiunngikkutta siunissaq eqqarsaatigalugu sulisussanik amigaateqartuassagatta.